



2017-imut Nunatta Karsiata naatsorsuutaasa akuersissutigineqarnissaannik siunnersuut
(Aningaasaqarnermut Naalakkersuisoq)

Siullermeerinnineq

Assut kusanarpasippoq 2017-mut Nunatta Karsiata naatsorsuutai sinneqartoorfiungaatsiarmata. Kisianni tamatumanga salloqittarneqassanngilagut. Sinneqartoornermut pissutaavoq aningaasartalinnik ingerlataqarluarneq aamma nunarsuarmi raajat aalisakkallu akigissaarnerat. Tamatuma saniatigut missingersuusiartarneqartumut naleqqiullugu akileraarutit akitsuutillu 100 millioner koruuninik amerlanerusunik isertitsissutaapput. Taava aamma inunnik isumaginninnerup iluani aningaasaliissutit inatsisinit qilarsukkat atuinikinneruffiusimapput.

Allatut oqaatigalugu kusanartumik angusaqarnermut pissutaanngillat Inatsisartut iluarsartuussinernik annertuunik akuersisimanerat imaluunniit pisortat allaffissornerata millisinneqarsimamera. Pissutaapput nalaatsornerinnamik pisimasut. Taamaattumik isumaqallariaanata pisarnitsitut ingerlaqqiinnassalluta. Tamanna nunatsinnut pitsaanaviannngimmat.

Kisitsisit sukumiinerusumik qimerlooraanni, taava takuneqarsinnaavoq ajornartorsiuteqartugut imaannaanngitsunik. Peqqinnissaqarfik aallarniutigeriarlara:

2017-mi napparsimasunut suliarinerlutaasunut taarsiissutissatut missingersuutitsinnut (Konto pingaarneq 34.01.02) naleqqiullugu ARFINEQ-PINGASORIAAMMIK amerlanerusut atorpagut. Immikkoortinneqarsimapput 300.000 koruunit - atorneqarsimallutilli 2.538.000 koruunit. Assersuutaavoq sulisut ikippallaarnerannut tamatumalu kinguneraa suliat ajornerunerat sulisullu sulerulunnerat, kukkunermik kinguneqartitsisinnaasartuq. Aamma ilassut eqqumiitsoq unaavoq: Isumaqaarnassagaluarpog Peqqissutsimut Naalakkersuisoq silattuallassimassasoq 2018-mut Aningaasanut Inatsimmi tassunga aningaasaliisoqassammat. Kisianni naamerluinnaq - 600.000 koruunit immikkoortinneqarput. Taamaakkaluartoq 2019-mut Aningaasanut Inatsisissatut siunnersuummi isumatusaartoqarnerulaarpoq, immikkoortinneqarsimappummi 1.500.000 koruunit. Taamaakkaluartoq 2017-mi atuisimanermut naleqqiullugu suli appasingaatsiarput tunngavilersorneqaranilu sooq ukiumi tassani tullianilu aningaasartuutit ikinnerussanersut.

Immikkoortoq alla ajornartorsiuteqartoqarneranik takutitsisoq tassaavoq nunani allani napparsimasunik katsorsaasarneq (Konto pingaarneq 34.11.01). Ukiup ingerlanerani kontumut pingaarnermut aningaasaliissutit 15 millioner koruuninik ilaneqarput. Kontumi tassani atuinerunerup takutippaa, napparsimasunik nunanut allanut nassiussisoqartarsimasoq nassuerutigalugu uagut nammineq napparsimaviutitsinni napparsimasut katsorsarnissaat periarfissaasimannngitsog sulisussaqaanngimmat. Taamaakkaluartorli konto taanna eqqarsaatigalugu Peqqissutsimut Naalakkersuisoq



silattuallassimasorinangilaq, kontumimi pingaarnermi tassani 2017-mi atorpeqarsimapput 144 millioner koruunit missaat - 2018-milu missingersuutigineqarsimallutik 130 millioner koruunit ataati-laarlugit. Tassa 14 millioner koruunit missaanni ikinaarlugit.

Napparsimasut amerlanerusut nunani allani napparsimavinni katsornarneqarpata, sualummik K benhavnimi taava Kalaallit Napparsimasut Angerlarsimaffianni (konto pingarneq 34.11.04) atuineq qaffassaaq. 2017-mi Napparsimasut Angerlarsimaffiat immikkut 1 millioner koruunit missaanni amerlanerusunik aningaasaliiffigineqarpoq - immikkulli atuinerusoqarsimalluni 1,7 millioner koruuninik.

Sulisussaaleqisoqartillugu aningaasanik immikkoortitsisoqartarpoq ilaatigut paarlatsit akissarsiassaannut, Sualummik Dronning Ingridip Napparsimavissuani (DIH) (konto pingarneq 34.11.03). Ilumoorporli DIH 2017-mi immikkut aningaasaliiffigeqqinneqarsimammat 16,5 millioner koruuninik - atuinerunerli annertussuseqarsimavoq 18,2 millioner koruuninik.

Kikkut tamarmik takusinnaavaat, ataqatigiittoqanngitsaq. Taamaattumik Naalakkersuisut kaammattussavakka missingersuusiortaqqullugit piviusorsiornerusunik.

Tamatuma saniatigut tupigusuutigaara pisortat allaffissornerannut aningaasartuutit qaffakkaluttuinnarmata. Allaffissornermut aningaasartuuteqarpallaaqaagut aamma malunnarpoq unikkallarnaviangitsaq, tamannalu Demokraatini ajornartorsiutit angisuutut isigaarput. Kisitsimmik taasilaaginnarusullunga oqaatigisinnaavara allaffissornermut aningaasartuutit 2015-miit 2016-mut 79 millioner koruuninik amerleriarsimammata kiisalu aamma immikkut 2016-miit 2017-mut 41 millioner koruuninik amerleriarsimallutik. Pitsanngorsaasinnaasariaqarpugut aningaasallu atorluarnerullugit.

Aamma ajornartorsiut takuneqarsinnaavoq nunap ingerlanneranut aningaasartuutit 195 millioner koruuninik akinerulersimammat 2016-miit 2017-mut. Sumummita aningaasat atoratsigit? Akimanerulersimanerpugut? Kiffaanngissuseqarnerulersimanerlutaluunniit?

Ungali takusinnaangilara taamaattoqartoq. Paarlattuanik nuna tamakkerlugu akileraarutinit isertitat aamma ingerlatseqatigiiffiit akileraarutaat 231 millioner koruuninik ikileriarsimapput 2016-miit 2017-mut. Taamaattumik innuttaasut suliffeqarfillu akimanerulersimarpassinngillat.

Paarlattuanlli innuttaasut akitsuutinik sullinneqarnermilu akitsuutinik Inatsisartut aalajangersangaannik akiliinerusalersimapput. Isertitat qaffassimapput 32 millioner koruuninik. Inuit ilaat akimanerulersinneqarsimanerlutik imaluunniit kiffanngissuseqarnerulersimanerlutik? Taamaattoqarunangilaq.

Pisariaqartipparput eqqarsarluarnissarput aningaasanik atuunitsinni. Allaffissornermut ikinnerusut atortaleriartigit iluanaarutigullu akileraarutit akitsuutillu apparnissaannut atorlugit, innuttaasut sinneqarnerusaleqqullugit namminerlu aalajangiisinaalersillugit sumut atussanerlugit.

Demokraatit isumarput naapertorlugu silassorissumik iliussagaluarpugut.



Naggataatigut tikkuarusuppara naapertuutingimmat Kukkunersiunermut Ataatsimiititaliap Inatsisartuni Siulittaasoqarfimmi aningaasartuutaasimasunut mattussaaqqammat. Paasiuminarsaasoqarnissaa amingaataavoq. Nalunngilara malittarisassat ullumikkut atuuttut naapertorlugit Inatsisartut Siulittaasoqarfiat matoqqasussaasoq, taamaakkaluartorli isumaqarsinnaatitaavunga tamanna kukkunerusoq. Kaammattorusuppara Inatsisartut Siulittaasoqarfiat nammineq piumassutsiminik atuinertik pillugu ammanerulissasut soorlu Naalackersuisut Naalackersuisoqarfiillu taamaattussaataasut.

Taamatut oqaaseqarluta siunnersuut suliareqqitassanngorlugu Kukkunersiunermut Ataatsimiititaliamut innersuupparput.